

L I G J
Nr.8003, datë 28.9.1995

KODI PENAL USHTARAK

Në mbështetje të nenit 16 të ligjit nr.7491, datë 29.4.1991 “Për dispozitat kryesore kushtetuese”, me propozimin e Këshillit të Ministrave,

KUVENDI POPULLOR
I REPUBLIKËS SË SHQIPËRISË

V E N D O S I:

DISPOZITA TË Pjesës së Përgjithshme

K R E U I
LIGJI PENAL USHTARAK DHE ZBATIMI I TIJ

Neni 1

Ligji penal ushtarak dhe ndarja e veprave penale

Ligji penal ushtarak përcakton veprat penale ushtarake, si dhe dënimet dhe masat e tjera që merren ndaj subjekteve që i kryejnë ato.

Veprat penale ushtarake ndahen në krime ushtarake dhe në kundërvajtje penale ushtarake. Dallimi i tyre bëhet në çdo rast në dispozitat e pjesës së posaçme të këtij Kodi.

Neni 2

Zbatimi i ligjit penal ushtarak

Shtetasit shqiptarë që kryejnë një vepër penale në fushën e mbrojtjes përgjigjen sipas Kodit Penal Ushtarak.

Për shtetasin shqiptar që kryen një vepër penale ushtarake në bashkëpunim me një ushtarak shqiptar do të zbatohet Kodi penal Ushtarak i Republikës së Shqipërisë.

Neni 3

Barazia e shteteve aleate

Dispozitat penale të parashikuara në këtë Kod, zbatohen edhe kur veprat penale janë kryer në dëm të një shteti të huaj, aleat me shtetin shqiptar.

Neni 4

Zbatimi i ligjit penal në hapësirë

Ligji penal ushtarak është i zbatueshëm edhe për ushtarakun shqiptar që kryen një vepër penale jashtë territorit të Republikës së Shqipërisë, kur vepra është njëkohësisht e dënueshme dhe derisa nuk është dhënë për të një vendim përfundimtar nga një gjykatë e huaj.

Neni 5

Zbatimi i ligjit penal ushtarak për vepra penale ushtarake të kryera nga shtetas të huaj ose pa shtetësi

Shtetasi i huaj ose pa shtetësi që kryen një vepër penale në fushën e mbrojtjes përgjigjet sipas ligjit penal ushtarak.

Shtetasi i huaj ose pa shtetësi që në bashkëpunim me ushtarakë shqiptarë kryen një vepër penale ushtarake brenda ose jashtë territorit të Republikës së Shqipërisë, përgjigjet në bazë të ligjit penal ushtarak të Republikës së Shqipërisë.

K R E U I I

PËRGJEGJËSIA PENALE SIPAS LIGJIT PENAL USHTARAK

Neni 6

Personat që përgjigjen sipas ligjit penal ushtarak

Me fjalën "ushtarak" kuptohen ata persona që bëjnë pjesë në forcat e armatosura, gjithashtu, edhe ata persona që ligji i barazon me ushtarakët.

Me fjalën "epor" kuptohet ushtaraku me gradë më të lartë ose ai që pavarësisht nga grada ka detyrë komanduese ose funksion më të lartë.

Ligji penal ushtarak zbatohet:

1. Për ushtarakët në shërbim aktiv, nga koha e caktuar për paraqitjen e tyre në armë, deri në kohën që, sipas dispozitave ligjore, lirohen efektivisht nga shërbimi.

2. Oficerët aktivë në pritje për t'u sistemuar ose të pezulluar.

3. Ushtarakët që vuajnë dënime disiplinore me izolim.

4. Të thirrurit në stërvitje, prova gatishmërie e mobilizimi.

5. Për të gjithë shtetasit që kryejnë një ose disa nga veprat penale në fushën e mbrojtjes.

6. Studentët e shkollave të larta ushtarake ose kursantët që vazhdojnë kurset e kualifikimit ushtarak.

7. Personat e tjerë që ligji i veçantë i barazon me ushtarakët.

KREU III D Ë N I M E T

Neni 7

Dënime kryesore

Për ushtarakët që kanë kryer krime jepen këto dënime kryesore:

1. Me burgim të përjetshëm a me vdekje.
2. Me burgim.
3. Lirim nga ushtria.
4. Me gjobë.

Për ushtarakët që kanë kryer kundërvajtje penale jepen këto dënime kryesore:

1. Me burgim.
2. Lirim nga ushtria.
3. Me gjobë.
4. Me degradim.

Neni 8

Dënime plotësuese

Për ushtarakët që kanë kryer krime ose kundërvajtje penale, bashkë me dënimin kryesor mund të jepen edhe një ose disa nga këto dënime plotësuese:

1. Ndalimi i të drejtës për të ushtruar një detyrë shtetërore.
2. Konfiskimi i mjeteve të kryerjes së veprës penale dhe përfitimeve prej saj.
3. Ndalimi për të drejtuar automjetin.
4. Heqja e dekoratave, titujve të nderit.
5. Lirimi nga ushtria për ushtarakët e shërbimit të përhershëm aktiv.
6. Shtytja e afatit të gradimit deri në tre vjet.

Gjykata, në raste të veçanta, kur dhënia e dënimeve kryesore çmohet e papërshtatshme dhe kur ligji parashikon dënim me burgim deri në tre vjet ose dënime të tjera më të lehta për veprën e kryer, mund të mjaftohet vetëm me caktimin e dënimit plotësues.

Neni 9

Dënimi me burgim dhe me gjobë

Dënimi me burgim për krime ushtarake jepet për një kohë nga pesë ditë deri në njëzetepesë vjet, ndërsa për kundërvajtjet penale ushtarake

për një kohë nga pesë ditë deri në dy vjet.

Dënimi me gjobë jepet për personat që kryejnë krim ose kundërvajtje penale ushtarake.

Për krimet ushtarake gjoba jepet nga pesë mijë deri në një milion lekë.

Për kundërvajtjet penale gjoba jepet nga tre mijë deri në njëqindmijë lekë.

Për ushtarët e shërbimit të detyrueshëm gjoba jepet nga njëmijë deri në pesëdhjetëmijë lekë.

Neni 10

Mënyra e vuajtjes së dënimit me burgim të përjetshëm dhe me burgim.

Ushtarakët e vuajnë dënimin me burgim të përjetshëm dhe me burgim në vende të veçanta nga të dënuarit civil.

Neni 11

Lirimi nga ushtria

Lirimi nga ushtria mund të jepet ndaj ushtarakëve të shërbimit aktiv të përhershëm që kryejnë krime ose kundërvajtje penale ushtarake.

Për krimet kjo masë është e përhershme, ndërsa për kundërvajtjet penale një vit.

Neni 12

Dënimi me degradim

Dënimi me degradim është ulje deri në dy gradë i ushtarakut që kryen kundërvajtje penale.

Neni 13

Zbatimi i dispozitave të pjesës së përgjithshme të Kodit Penal (civil)

Për personat që kryejnë vepra penale ushtarake, do të zbatohen edhe rregullat e pjesës së përgjithshme të Kodit Penal (civil) që nuk parashikohen në këtë Kod.

Neni 14
**Zbatimi i dispozitave të pjesës së posaçme të Kodit Penal
(civil) për ushtarakët**

Kur ushtaraku kryen një veprë penale që nuk parashikohet në këtë Kod, do të përgjigjet në bazë të dispozitave të Kodit Penal (civil).

PJESA E POSAÇME

KREU I
VEPRA PENALE NË FUSHËN E MBROJTJES

Neni 15
Shmangia nga evidenca ushtarake

Shmangia e shtetasit shqiptar nga regjistrimi ose mosbërja e ndryshimeve në evidencën ushtarake të kryera më shumë se një herë përbën kundravajtje penale dhe dënohet me gjobë ose me burgim deri në gjashtë muaj.

Neni 16
Shmangia nga thirrja për shërbim ushtarak

Shmangia e shtetasit shqiptar nga thirrja për të kryer shërbimin e detyrueshëm ushtarak aktiv, kur nuk përbën kundërvajtje administrative, dënohet si kundërvajtje penale me gjobë ose me burgim deri në dy vjet.

Shmangia e shtetasit shqiptar nga thirrja për stërvitje ushtarake ose prova gatishmërie, kur kryhet më shumë se një herë, përbën kundravajtje penale dhe dënohet me degradim, me gjobë ose burgim deri në dy vjet.

Po këto vepra të kryera në kohë lufte ose gjendje të jashtëzakonshme dënohen me burgim nga dy deri në pesë vjet.

Neni 17
Shmangia nga detyrimi për dorëzim teknike

Shmangia nga detyrimi për dorëzimin e teknikës, të mjeteve të transportit, pajisjeve ose kafshëve të punës, kur kryhet më shumë se një herë, përbën kundërvajtje penale dhe dënohet me gjobë ose me burgim deri në gjashtë muaj.

Po kjo veprë e kryer në kohë lufte ose gjendje të jashtëzakonshme dënohet me burgim deri në pesë vjet.

Neni 18
Mashtrimi për rekrutim

Çdo person që, për të rregulluar rekrutimin ose largimin e tij nga forcat e armatosura, paraqet të dhëna të pasakta ose i fsheh ato, kryen kundërvajtje penale dhe dënohet me gjobë ose me burgim deri në dy vjet.

Neni 19
Rekrutimi i paligjshëm

Çdo person që ndihmon personat e tjerë për të përfituar rekrutimin ose emërimin ose largimin nga forcat e armatosura pa plotësuar kushtet e parashikuara me ligj, kryen kundërvajtje penale dhe dënohet me gjobë ose me burgim deri në dy vjet.

Neni 20
Pengimi i stërvitjeve dhe detyrave në fushën e mbrojtjes civile

Pengimi që u bëhet komandave, trupave e mjeteve ushtarake, në stërvitje, kushtrim e operacione të tjera, përbën kundërvajtje penale dhe dënohet me gjobë ose me burgim deri në dy vjet.

Po kjo vepër, e kryer në kohë lufte ose gjendje të jashtëzakonshme, dënohet me burgim deri në pesë vjet.

Neni 21
Pengimet në furnizimet e forcave të armatosura

Mosrealizimi me dashje i detyrimeve kontraktore gjatë kohës kur trupat ndodhen në stërvitje ose operacione ushtarake, dënohet me gjobë ose me burgim deri në tre vjet.

Po kjo vepër, e kryer në kohë lufte ose gjendje të jashtëzakonshme, dënohet me burgim nga tre deri në dhjetë vjet.

Neni 22
Shmangia nga detyrimet e mbrojtjes civile

Moskryerja në kohë lufte ose gjendje të jashtëzakonshme e detyrimeve për mbrojtjen civile të vendit, përbën kundërvajtje penale dhe dënohet me gjobë ose me burgim deri në dy vjet.

Neni 23
Shkelja e rregullave të sjelljes shoqërore në kohë lufte

Shkelja e rregullave të ndriçimit ose të rregullave të tjera të detyrueshme në kohë lufte, kur kryhet më shumë se një herë ose ka sjellë pasoja të rënda, dënohet me burgim deri në tre vjet.

Neni 24

Përhapja në kohë lufte e informatave që ngjallin panik

Përhapja e informatave të rreme që ngjallin panik, e kryer në kohë lufte, dënohet me burgim deri në pesë vjet.

Kur kjo vepër ka shkaktuar pasoja të rënda, dënohet me burgim jo më pak se pesë vjet.

KREU II

KRIME USHTARAKE KUNDËR SIGURIMIT KOMBËTAR

Neni 25

Dorëzimi i forcave ushtarake dhe i mjeteve të luftimit armikut

Dorëzimi te armiku, nga ana e komandantit, i forcave ushtarake, mjeteve, armatimit, municionit e të teknikës që i janë besuar, dënohet me burgim nga pesë deri në njëzet vjet dhe kur ka shkaktuar pasoja të rënda në njerëz ose në teknikë, jo më pak se pesëmbëdhjetë vjet, me burgim të përjetshëm a vdekje.

Neni 26

Dhënia e informatave sekrete

Ushtaraku që i jep armikut të gjithë ose një pjesë të situatës së forcave të armatosura, planin e një operacioni, lëvizjet, fushimet, pozicionet, sinjalet e çdo lloji, gjendjen e furnizimit a të municionit, vendfurnizimet, karburantet, ushqimet ose paratë apo i lë në dorë dokumente ose të dhëna të tjera me karakter sekret, dënohet me burgim jo më pak se pesë vjet.

Po kjo vepër e kryer për operacione ose mjete e teknikë të rëndësishme luftarake, si dhe kur nga dhënia e informatave janë shkaktuar pasoja të rënda, dënohet me burgim jo më pak se pesëmbëdhjetë vjet ose me burgim të përjetshëm a vdekje.

Neni 27

Zhdukja e akteve që lidhen me sigurimin kombëtar.

Ushtaraku, që për të dëmtuar sigurimin kombëtar zhduk, shkatërron, falsifikon, rrëmben apo fut në dorë dokumente ose akte të

karakterit sekret shtetror, dënohet me burgim jo më pak se dhjetë vjet.

Neni 28

Dhënia e ndihmës armikut

Ushtaraku që në kushtet e luftës ose gjendjes së jashtëzakonshme ndihmon armikun me armë, municion, mjete e pajisje të tjera, me para ose çdo gjë tjetër ose strehon apo mbron armikun, dënohet me burgim jo më pak se pesë vjet ose burgim të përjetshëm a vdekje.

Neni 29

Veprime të ulta para armikut

Ushtaraku që në prezencë apo përpara momentit të shfaqjes së armikut;

1. largohet;
 2. dorëzon pozicionin, materialet ushtarake;
 3. për shkak të mos zbatimit të rregullave apo mosbindjes rrezikon sigurinë e postit, vendit e materialeve ushtarake;
 4. flak armën apo municionin;
 5. është fajtor për manovrime të ngathta;
 6. braktis vendin e caktuar;
 7. shkakton alarme fallso në njësinë apo vendin që është nën kontrollin e forcave të armatosura;
 8. me qëllim nuk kryen veprimet e mundshme për të kapur, shkatëruar, çarmatosur trupat armike;
 9. nuk u jep ndihmën e duhur forcave tona apo aleatëve tanë;
 10. nuk bën të gjitha përpjekjet e duhura për të fshehur apo asgjësuar të gjithë dokumentacionin me karakter sekret kur kapet nga armiku,
- dënohet me burgim jo më pak se dhjetë vjet.

Neni 30

Shpërdorimi i mandatit

Ushtaraku që caktohet nga Shteti Shqiptar të diskutojë me shtete e fuqi të huaja probleme shtetërore dhe nuk i qëndron besnik mandatit, duke i shkaktuar pasoja interesave kombëtare, dënohet me burgim jo më pak se pesë vjet.

Neni 31
Ndihma spiunëve

Ushtaraku që jep apo gjen strehim ose ndihmon në forma të ndryshme një spiun apo agjent të armikut, dënohet me burgim deri në pesë vjet.

Ushtaraku që i jep informacione me karakter sekret, spiunëve, dënohet me burgim jo më pak se pesë vjet.

Po kjo vepër e kryer në kohë lufte ose gjendje të jashtëzakonshme dënohet me burgim jo më pak se dhjetë vjet.

Neni 32
Rebelimi

Ushtaraku që kërkon të uzurpojë ose të mospërfillë autoritetin, të protestojë në bashkëpunim dhe me pjesëtarë të tjerë të Forcave të Armatosura, të mos u bindet urdhrave me qëllim që të mos respektohet Kushtetuta, ligji dhe rregulli në Forcat e Armatosura, të krijojë me të tjerë revolta e dhunë apo çdo formë tjetër çrregullimi, dënohet me burgim jo më pak se pesë vjet.

Ushtaraku që nuk vepron për të ndaluar apo shtypur rebelimin që kryhet apo është në përgatitje për t'u kryer, dënohet me burgim jo më pak se pesë vjet.

Veprat e sipërme të kryera në kohë lufte ose gjendje të jashtëzakonshme dënohen me burgim jo më pak se dhjetë vjet.

KREU III
SHMANGIA NGA SHËRBIMI USHTARAK

Neni 33
Dezertimi

Largimi nga reparti ose vendi i shërbimit, i ushtarëve dhe nënoficerëve, me qëllim shmangie përgjithmonë nga shërbimi ushtarak, si dhe mosparaqitja e tyre me të njëjtin qëllim në repartin ose vendin e shërbimit me rastin e emërimit, transferimit, kthimit nga misioni, nga spitali ose nga leja, dënohet me burgim deri në pesë vjet.

Po kjo vepër e kryer në kohë lufte ose në gjendje të jashtëzakonshme dënohet me burgim nga pesë deri në pesëmbëdhjetë vjet dhe, kur ka sjellë pasoja të rënda, me burgim jo më pak se dhjetë vjet.

Neni 34

Dezertimi i kuadrit komandues

Dezertimi i personave të kuadrit komandues, oficerë dhe nënoficerë aktivë, dënohet me burgim deri në dhjetë vjet.

Po kjo vepër e kryer në kohë lufte ose në gjendje të jashtëzakonshme dënohet me burgim jo më pak se pesë vjet dhe, kur ka sjellë pasoja të rënda, jo më pak se pesëmbëdhjetë vjet, me burgim të përjetshëm a me vdekje.

Neni 35

Largimi pa leje

Largimi pa leje i ushtarakut nga reparti ose vëndi i shërbimit për një kohë për më shumë se pesë ditë ose më shumë se një herë, për një kohë më tepër se njëzetekatër orë, përbën kundërvajtje penale dhe dënohet me degradim, me gjobë ose me burgim deri në një vit.

Po kjo vepër e kryer nga oficerët dhe nënoficerët e shërbimit aktiv për një kohë për më shumë se shtatë ditë ose më shumë se një herë, për një kohë më tepër se njëzetekatër orë, përbën kundërvajtje penale dhe dënohet me degradim, me gjobë, nxjerrje në lirim ose me burgim deri në dy vjet.

Kur këto vepra kryhen në kohë lufte ose në gjendje të jashtëzakonshme dënohen me burgim nga dy deri në dhjetë vjet.

Neni 36

Mosparaqitja në repart ose në vendin e shërbimit

Mosparaqitja e ushtarëve dhe nënoficerëve të shërbimit të detyruar ushtarak pa shkaqe të arsyeshme në repart ose në vendin e shërbimit me rastin e emërimit, transferimit, kthimit nga misioni, nga spitali ose leja, për një kohë më tepër se pesë ditë ose më shumë se një herë për një kohë më tepër se njëzetekatër orë, përbën kundërvajtje penale dhe dënohet me gjobë ose me burgim deri në një vit.

Po kjo vepër e kryer në kohë lufte apo në gjendje të jashtëzakonshme dënohet me burgim nga dy deri në dhjetë vjet.

Neni 37

Mosparaqitja e oficerëve dhe nënoficerëve aktivë

Mosparaqitja e oficerëve dhe nënoficerëve të shërbimit aktiv në repart ose në vendin e shërbimit pa shkaqe të arsyeshme me rastin e emërimit, transferimit, kthimit nga misioni ose detyra, nga spitali ose nga

leja për një kohë për më tepër se shtatë ditë ose më shumë se një herë për një kohë më tepër se njëzetekatër orë, përbën kundërvajtje penale dhe dënohet me degradim, me gjobë, nxjerrje në lirim ose me burgim deri në dy vjet.

Po kjo veprë e kryer në kohë lufte ose gjendje të jashtëzakonshme dënohet me burgim nga dy deri në dhjetë vjet.

Neni 38

Largimi pa leje i të thirrurve për stërvitje

Largimi pa leje nga reparti i ushtarakëve të thirrur në stërvitje ushtarake, më shumë se një herë, përbën kundërvajtje penale dhe dënohet me degradim ose me gjobë.

Po kjo veprë e kryer me përsëritje, në kohë lufte ose gjendje të jashtëzakonshme, dënohet me burgim deri në tre vjet.

Neni 39

Mosparaqitja e të thirrurve në stërvitje

Mosparaqitja e ushtarakëve të thirrur në stërvitje në kohën e caktuar në repart ose në vendin e shërbimit pa shkaqe të arsyeshme, përbën kundërvajtje penale dhe dënohet me degradim ose gjobë.

Po kjo veprë e kryer me përsëritje, në kohë lufte ose në gjendje të jashtëzakonshme, dënohet me burgim deri në tre vjet.

Neni 40

Shmangie të tjera nga shërbimi ushtarak

Shmangia nga shërbimi ushtarak ose nga kryerja e detyrave të caktuara të shërbimit ushtarak, duke u shtirë i sëmurë, duke dëmtuar shëndetin, duke falsifikuar dokumente ose me ndonjë mënyrë tjetër të ngjashme, kur shmangia ka zgjatur deri në një muaj, dënohet me burgim deri në dy vjet.

Po këto vepra të kryera në kohë lufte ose gjendje të jashtëzakonshme, kur shmangia ka zgjatur deri në një muaj, dënohen me burgim nga dy deri në shtatë vjet.

Shmangia me mënyrat e mësipërme, kur ka zgjatur mbi një muaj, dënohet me burgim nga dy deri në pesë vjet.

Këto vepra të kryera në kohë lufte ose gjendje të jashtëzakonshme, kur shmangia zgjat mbi një muaj, dënohen me burgim jo më pak se pesë vjet.

Neni 41

Shkelja e rregullave të shërbimit të rojes

Ushtaraku që kapet i dehur, duke fjetur gjatë detyrës ose që largohet para se të ndërrohet nga shërbimi, dënohet me burgim deri në dy vjet.

Shkelja e rregullave të shërbimit të rojes kur kanë sjellë pasoja të rënda dënohet me burgim nga dy deri në tetë vjet.

Shkeljet e rregullave të shërbimit të rojes të kryera në kohë lufte ose gjendje të jashtëzakonshme dënohet me burgim nga tre deri në dhjetë vjet dhe, kur ka sjellë pasoja të rënda, jo më pak se dhjetë vjet.

Neni 42

Shkelja e rregullave të shërbimit të rojes në objekte të rëndësishme

Shkelja e rregullave të shërbimit të rojes, pranë depove të armëve, të municioneve e lëndëve plasëse ose në objekte që kanë rëndësi veçanërisht të madhe shtetërore ose ushtarake, të njohura si të tilla në akte të veçanta, dënohen me nxjerrje në lirim ose burgim deri në tre vjet.

Kur nga kjo vepër kanë ardhur pasoja të rënda dënohet me burgim nga një deri në pesë vjet.

Po kjo vepër e kryer në kohë lufte ose gjendje të jashtëzakonshme dënohet me burgim nga tre deri në dhjetë vjet dhe, kur ka sjellë pasoja të rënda, jo më pak se dhjetë vjet.

Neni 43

Shkelja e rregullave të shërbimit të rojes në kufi

Shkelja e rregullave të shërbimit të rojes në kufi dënohet me burgim deri në dy vjet.

Kur nga këto vepra kanë ardhur pasoja të rënda dënohet me burgim nga dy deri në tetë vjet.

Po kjo vepër e kryer në kohë lufte ose në gjendje të jashtëzakonshme dënohet me burgim nga pesë deri në pesëmbëdhjetë vjet dhe, kur ka sjellë pasoja të rënda, me burgim jo më pak se dhjetë vjet.

Neni 44

Shkelja e rregullave të shoqërimit

Shkelja e rregullave të shoqërimit nga ushtaraku i ngarkuar me këtë detyrë përbën kundërvajtje penale dhe dënohet me degradim, me gjobë, nxjerrje në lirim ose me burgim deri në dy vjet.

Kur nga kjo vepër kanë ardhur pasoja të rënda dënohet me burgim

nga dy deri në tetë vjet.

Po kjo vepër e kryer në kohë lufte ose gjendje të jashtëzakonshme dënohet me burgim nga tre deri në dhjetë vjet dhe, kur kanë ardhur pasoja të rënda, jo më pak se dhjetë vjet.

Neni 45

Moscaktimi i rojeve

Moscaktimi ose mosnxjerrja e rojeve ose personave për shoqërim, pa shkaqe të arsyeshme përbën kundërvajtje penale dhe dënohet me degradim, me gjobë, nxjerrje në lirim ose me burgim deri në një vit.

Po kjo vepër e kryer në kohë lufte ose gjendje të jashtëzakonshme dënohet me burgim deri në dhjetë vjet dhe, kur ka sjellë pasoja veçanërisht të rënda, me burgim nga pesë deri në pesëmbëdhjetë vjet.

Neni 46

Moszbatimi i urdhrit

Mos bindja ose moszbatimi i urdhrave nga ushtaraku, i cili është i detyruar t'i zbatojë e respektojë ato, përbën kundërvajtje penale dhe dënohet me degradim, me gjobë, nxjerrje në lirim ose me burgim deri në dy vjet.

Po kjo vepër e kryer në kohë lufte apo në gjendje të jashtëzakonshme dënohet me burgim deri në dhjetë vjet.

Neni 47

Moszbatimi i urdhrit nga kuadri komandues.

Moszbatimi i urdhrit i kryer prej një personi të kuadrit komandues dënohet me nxjerrje në lirim ose me burgim deri në tre vjet.

Kur nga kjo vepër janë shkaktuar pasoja të rënda dënohet me burgim nga dy deri në tetë vjet.

Po kjo vepër, e kryer në kohë lufte ose gjendje të jashtëzakonshme, dënohet me burgim jo më pak se dhjetë vjet dhe, kur ka sjellë pasoja të rënda, dënohet me burgim jo më pak se pesëmbëdhjetë vjet, me burgim të përjetshëm a me vdekje.

Neni 48

Lëvizja e trupave pa të drejtë

Komandanti që pa autorizim, urdhër, mision të veçantë ose shkak tjetër të ligjshëm urdhëron lëvizjen e trupave ose mjeteve tokësore, detare apo ajrore, kryen kundërvajtje penale dhe dënohet me degradim, me

gjobë, nxjerrje në lirim ose me burgim deri në dy vjet.

Neni 49

Ulja e dinjitetit ushtarak

Kryerja nga ushtaraku e veprimeve që ulin dinjitetin e forcave të armatosura, si në shërbim ashtu dhe jashtë shërbimit, përbën kundërvajtje penale dhe dënohet me degradim, me gjobë, nxjerrje në lirim ose me burgim deri në dy vjet.

KREU IV

VEPRA PENALE KUNDËR AUTORITETIT USHTARAK

Neni 50

Shtrëngimi për të shkelur detyrat

Kundërshtimi që i bën ushtaraku një ushtaraku tjetër kur ky është duke kryer detyrat e shërbimit ushtarak që i janë ngarkuar, si dhe shtrëngimi i tij për t'i shkelur ato, dënohet me burgim deri në pesë vjet.

Kur kjo vepër është kryer me dhunë apo ka sjellë pasoja të rënda dënohet me burgim nga tre deri në dhjetë vjet.

Po kjo vepër e kryer në kohë lufte apo në gjendje të jashtëzakonshme dënohet me burgim jo më pak se pesë vjet dhe, kur ka sjellë pasoja të rënda, me burgim jo më pak se dhjetë vjet, me burgim të përjetshëm a me vdekje.

Neni 51

Goditja ose kundërshtimi i eprorit

Çdo ushtarak që kundërshton me dhunë apo godet eprorin e tij gjatë kohës që oficeri është në detyrë ose për shkak të saj dënohet me burgim deri në pesë vjet.

Po kjo vepër e kryer në kohë lufte apo gjendje të jashtëzakonshme dënohet me burgim nga tre deri në dhjetë vjet.

Neni 52

Goditja ose kundërshtimi i nënoficerit

Çdo nënoficer apo ushtar që kundërshton me dhunë apo godet një nënoficer në kohën kur ky i fundit është në detyrë, ose për shkak të saj, apo sillet me përbuzje ose pa respekt, me fjalë a veprime, kryen kundërvajtje penale dhe dënohet me degradim, me gjobë, nxjerrje në lirim ose me burgim deri në dy vjet.

Neni 53

Kundërshtimi i policisë ushtarake

Kundërshtimi që i bëhet punonjësit të policisë ushtarake për ta penguar në kryerjen e detyrës së tij sipas ligjit, përbën kundërvajtje penale dhe dënohet me degradim, me gjobë, nxjerrje në lirim ose me burgim deri në një vit.

Po kjo vepër e kryer me dhunë fizike dënohet me burgim nga një deri në pesë vjet.

Neni 54

Mosrespekti ndaj oficerit epror

Ushtaraku, i cili sillet pa respekt, me fjalë a veprime kundrejt cilitdo oficer epror, kryen kundërvajtje penale dhe dënohet me degradim, me gjobë, nxjerrje në lirim ose me burgim deri në gjashtë muaj.

KREU V

VJEDHJE, SHPËRDORIME, FALSIFIKIME

Neni 55

Vjedhje armatimi

Ushtaraku që vjedh armatim luftarak, dënohet me burgim jo më pak se tre vjet.

Po kjo vepër e kryer në kohë lufte ose gjendje të jashtëzakonshme, dënohet me burgim jo më pak se dhjetë vjet.

Neni 56

Vjedhje e pjesëve të armatimit

Ushtaraku që vjedh pjesë të veçanta të armatimit ose të teknikës luftarake, dënohet me burgim deri në dy vjet.

Po kjo vepër, kur ka cenuar gatishmërinë e armatimit luftarak, dënohet me burgim nga dy deri në pesë vjet.

Neni 57

Vjedhja e municionit

Ushtaraku, që vjedh municion luftarak, dënohet me burgim deri në dhjetë vjet.

Po kjo vepër e kryer në kohë lufte ose gjendje të jashtëzakonshme

dënohet me burgim jo më pak se dhjetë vjet.

Neni 58

Shitja e armatimit ose e pajisjeve ushtarake

Ushtaraku që shet armatimin, municionin, mjetet dhe pajisjet e tjera të dhëna në përdorim vetjak, dënohet me gjobë, nxjerrje në lirim ose me burgim deri në pesë vjet.

Neni 59

Vjedhja e pronës ushtarake

Vjedhja e pronës ushtarake dënohet me burgim deri në dhjetë vjet.

Vjedhja e pasurisë ushtarake si armatim, municion, mjete, materiale e pajisje të tjera e shoqëruar me përdorim arme ose kur ka sjellë pasojë vdekjen ose pasoja të tjera të rënda, dënohet me burgim jo më pak se pesëmbëdhjetë vjet, me burgim të përjetshëm a vdekje.

Neni 60

Vjedhje në fushën e betejës

Vjedhja e sendeve që gjenden te të vrarët e të plagosurit në fushën e betejës, si dhe plaçkitja e robërve të luftës, dënohet me burgim nga tre deri në dhjetë vjet. Kur ka rrethana rënduese, me burgim jo më pak se pesë vjet.

Neni 61

Vjedhja e plaçkës së luftës

Ushtaraku që nuk siguron të gjithë plaçkën e luftës që i është marrë armikut, që nuk lajmëron komandën, e vjedh ose e shpërdoron atë dhe nuk dorëzon në autoritet përkatëse të gjithë materialet e kapura a të braktisura ose që ndodhen në ruajtje apo nën kontroll, dënohet me burgim deri në dhjetë vjet.

Neni 62

Shpërdorimi, shkatërrimi ose dëmtimi i pasurisë ushtarake

Shpërdorimi, shkatërrimi ose dëmtimi me dashje i armatimeve, i mjeteve të komunikacionit ose të ndërlydhjes dhe të teknikës luftarake, të dhëna në përdorim ose në ruajtje, dënohen me burgim deri në dhjetë vjet.

Po këto vepra të kryera me zjarr a me mjet tjetër të rrezikut të përbashkët ose kur kanë shkaktuar vdekje ose pasoja të tjera të rënda ose

në kohë lufte a gjendje të jashtëzakonshme, dënohen me burgim jo më pak se pesë vjet.

Neni 63

Shkatërrimi i pasurisë ushtarake nga pakujdesia

Shkatërrimi nga pakujdesia i armatimeve, i teknikës luftarake ose i mjeteve të komunikacionit dhe të ndërlidhjes, të dhëna në ruajtje ose në përdorim, dënohet me gjobë, me nxjerrje në lirim ose me burgim deri në pesë vjet.

Po këto vepra, kur kanë shkaktuar vdekje ose pasoja të tjera të rënda ose janë kryer në kohë lufte a gjendje të jashtëzakonshme, dënohen me burgim deri pesëmbëdhjetë vjet.

Neni 64

Shkatërrimi i mjeteve të luftimit

Shkatërrimi ose vënia jashtë përdorimit nga ana e kuadrit komandues, në kundërshtim me rregullat ushtarake, e fortifikatave, e anijeve, tankeve, aeroplanëve, depove ushtarake e mjeteve të tjera të luftimit që janë besuar, mosmarrja e masave të duhura për shkatërrimin ose vënien jashtë përdorimit të mjeteve të mësipërme të luftimit, kur ato rrezikohen të bien menjëherë në duart e armikut dhe, kur nuk janë përdorur të gjitha mundësitë dhe mënyrat për shpëtimin e tyre, dënohen me burgim nga pesë deri në pesëmbëdhjetë vjet dhe, kur janë shkaktuar pasoja të rënda, me burgim jo më pak se pesëmbëdhjetë vjet.

Neni 65

Falsifikimi i dokumenteve të luftimit

Falsifikimi i dokumenteve të luftimit në kohë lufte ose në gjendje të jashtëzakonshme dënohet me burgim nga pesë deri në pesëmbëdhjetë vjet.

Neni 66

Riprodhimi i palejuar i dokumenteve

Personi që pa pasur për detyrë, bën fotografi, skica, vizatime në objekte të rëndësishme ushtarake ose riprodhon dokumente sekrete pa leje, kryen kundravajtje penale dhe dënohet me degradim, me gjobë, nxjerrje në lirim ose me burgim deri në dy vjet.

Neni 67

Humbja e dokumentave

Ushtaraku që humb ose nga pakujdesia dëmton dokumente zyrtare që i janë besuar për shkak të detyrës e që kanë të bëjnë me armatimet, materialet ushtarake, plane operacionale, vendosjen e reparteve, fortifikimet, teknikën, dënohen me gjobë, nxjerrje në lirim ose me burgim deri në tre vjet.

Po këto vepra të kryera në kohë lufte ose gjendje të jashtëzakonshme dënohen me burgim nga tre deri në dhjetë vjet.

Neni 68

Shkelja e rregullave në administrimin e sekretit

Ushtaraku i ngarkuar të mbajë nën ruajtje ose administrim sekretin shtetëror apo ushtarak dhe, nga pakujdesia në zbatimin e rregullave, mundëson apo lehtëson kryerjen e veprimeve në dëm të ruajtjes së sekretit, dënohet me degradim, me gjobë, me nxjerrje në lirim ose me burgim deri në dy vjet.

Po kjo vepër e kryer në kohë lufte ose gjendje të jashtëzakonshme dënohet me burgim nga një deri në pesë vjet.

Shkelja me dashje e rregullave për administrimin ose ruajtjen e sekretit, kur këto vepra mundësojnë ose lehtësojnë kryerjen e veprimeve në dëm të ruajtjes së sekretit, dënohen me burgim nga një deri në pesë vjet.

Kur kjo vepër është kryer në kohë lufte ose gjendje të jashtëzakonshme dënohet me burgim jo më pak se pesë vjet.

Neni 69

Vjedhja e dokumenteve sekrete

Vjedhja ose futja në dorë në forma të tjera e dokumenteve që përbëjnë sekret ushtarak me qëllim përfitimi dënohet me burgim deri në pesë vjet.

Neni 70

Shpërdorimi i detyrës nga ushtaraku.

Kryerja ose mos kryerja me dashje e veprimeve, në kundërshtim me ligjin apo me përmbushjen e rregullt të detyrës nga kuadri komandues, kur i kanë sjellë pasoja të rënda shtetit ose interesave të ligjshme të shtetasve, dënohet me gjobë, nxjerrje në lirim ose burgim deri në dhjetë vjet.

Po kjo vepër e kryer në kohë lufte ose në gjendje të jashtëzakonshme dënohet me burgim nga pesë deri në pesëmbëdhjetë vjet.

Neni 71
Keqtrajtimi

Ushtaraku që sillet me arrogancë apo keqtrajton vartësit e tij kryen kundërvajtje penale dhe dënohet me degradim me gjobë ose me burgim deri në dy vjet.

Neni 72
Pranimi i favoreve nga ushtaraku

Ushtaraku që pa autorizim pranon funksione, nderime, pensione, vlerësime të kësaj natyre nga një shtet i huaj ose që mban botërisht uniforma, shënja dalluese të gradës ushtarake ose dekorata kombëtare të vendit apo të huaj që nuk i takojnë, kryen kundërvajtje penale dhe dënohet me degradim, me gjobë, nxjerrje në lirim ose me burgim deri në dy vjet.

Neni 73
Shkelja e barazisë së shtetasve

Kur ushtaraku gjatë kryerjes së detyrës shtetërore bën dallime mbi baza origjine, seksi, gjendjeje shëndetësore, bindjeje fetare, politike, të përkatësisë së një etnie, kombësie, race apo feje të caktuar, që shprehen në krijimin e privilegjeve të padrejta ose në refuzimin e një të drejte ose përfitimi që buron nga ligji, dënohet me gjobë, nxjerrje në lirim ose me burgim deri në pesë vjet.

Neni 74
Kryerja e funksioneve pas dhënies fund të tyre

Ushtaraku që pa urdhër, autorizim apo shkak të ligjshëm, merr përsipër një komandë, drejtim, shërbim ose ai që, megjithëse i është komunikuar urdhri që është hequr, që e ndalon ose e pezullon nga detyra komanduese ose drejtuese, vazhdon ta kryejë atë, dënohet me gjobë, nxjerrje në lirim ose me burgim deri në tre vjet.

Po kjo vepër e kryer në kohë lufte ose gjendje të jashtëzakonshme dënohet me burgim nga tre deri në dhjetë vjet.

Neni 75

Përdorimi i vartësve për shërbime vetjake

Përdorimi nga eprori i vartësit për shërbime vetjake të tij, të familjes ose në favor të personave të tjerë, përbën kundërvajtje penale dhe dënohet me degradim, me gjobë, nxjerrje në lirim ose me burgim deri në dy vjet.

Neni 76

Shmangia nga detyra

Ushtaraku, që është i ngarkuar me zbatimin e një detyre ose misioni dhe pa shkak të ligjshëm shmanget nga instruksionet e marra, duke dëmtuar përfundimin, kryen kundërvajtje penale dhe dënohet me degradim, me gjobë, nxjerrje në lirim ose me burgim deri në dy vjet.

Po kjo vepër e kryer në kohë lufte ose gjendje të jashtëzakonshme dënohet me burgim nga tre deri në dhjetë vjet.

KREU VI

KRIME KUNDËR JETËS DHE SHËNDETIT TË USHTARAKUT

Neni 77

Vrasja me dashje e ushtarakut

Vrasja me dashje e kryer nga eprori ndaj vartësit, nga vartësi ndaj eprorit ose ndërmjet ushtarakëve për motive që lidhen me kryerjen e detyrës ushtarake, dënohen me burgim jo më pak se pesëmbëdhjetë vjet, me burgim të përjetshëm a vdekje.

Neni 78

Vrasja nga pakujdesia

Shkelja e rregulloreve ushtarake që kanë sjellë si pasojë vdekjen e një personi nga pakujdesia dënohet me burgim nga dy deri në tetë vjet.

Neni 79

Plagosja e rëndë me dashje e ushtarakut

Plagosja e rëndë me dashje e kryer nga eprori ndaj vartësit ose e vartësit ndaj eprorit ose midis ushtarakëve, për motive që lidhen me kryerjen e detyrës ushtarake, dënohet me burgim nga tre deri në dhjetë vjet.

Neni 80

Plagosja e rëndë nga pakujdesia

Shkelja e rregulloreve ushtarake që kanë sjellë si pasojë plagosjen e rëndë nga pakujdesia të një ose më shumë personave përbën kundravajtje penale dhe dënohet me degradim, me gjobë, nxjerrje në lirim ose me burgim deri në dy vjet.

Neni 81

Plagosja e lehtë me dashje e ushtarakut

Plagosja e lehtë me dashje e kryer nga ushtaraku ndaj një ushtaraku tjetër për motive që lidhen me detyrën ushtarake përbën kundravajtje penale dhe dënohet me degradim, me gjobë, nxjerrje në lirim ose me burgim deri në dy vjet.

Neni 82

Plagosja nga pakujdesia

Shkelja e rregulloreve ushtarake që ka sjellë si pasojë plagosjen e lehtë nga pakujdesia të një ose më shumë personave përbën kundërvajtje penale dhe dënohet me degradim, me gjobë, nxjerrje në lirim ose me burgim deri në gjashtë muaj.

KREU VII

VEPRA PENALE KUNDËR RENDIT DHE SIGURISË PUBLIKE

Neni 83

Shkelja e rregullave të fluturimit ajror

Shkelja nga ushtaraku e rregullave të fluturimit dhe të përgatitjes së teknikës së fluturimit, kur nga këto janë shkaktuar vdekja ose pasoja të tjera të rënda, dënohet me burgim deri në pesëmbëdhjetë vjet.

Po këto vepra të kryera në kohë lufte ose në gjendje të jashtëzakonshme dënohen jo më pak se pesë vjet.

Neni 84

Shkelja e rregullave të lundrimit të anijeve

Shkelja nga ushtaraku e rregullave të lundrimit të anijeve dhe të përgatitjes së lundrimit, kur nga këto vepra janë shkaktuar vdekje ose pasoja të tjera të rënda, dënohet me burgim deri në pesëmbëdhjetë vjet.

Po kjo vepër e kryer në kohë lufte ose gjendje të jashtëzakonshme

dënohet me burgim jo më pak se pesë vjet.

Neni 85

Mosdhënia e ndihmës nga kapiteni i anijes ushtarake

Mosdhënia e ndihmës nga kapiteni i anijes ushtarake njerëzve që janë duke u mbytur në det ose në ujërat e tjera, kur kjo ndihmë mund të jepet pa rrezik serioz për anijen dhe ekuipazhin, dënohet me gjobë, nxjerrje në lirim ose me burgim deri në tre vjet.

Neni 86

Shkelja e rregullave në drejtimin dhe shfrytëzimin e makinave luftarake

Shkelja e rregullave në drejtimin dhe shfrytëzimin e makinave luftarake, kur nga këto vepra janë shkaktuar vdekje ose pasoja të tjera të rënda, dënohet me burgim deri në pesëmbëdhjetë vjet.

Po kjo vepër e kryer në kohë lufte ose gjendje të jashtëzakonshme dënohet me burgim jo më pak se pesë vjet.

KREU VIII

VEPRA PENALE NË KUSHTET E OPERACIONEVE USHTARAKE

Neni 87

Shmangia nga urdhërat për luftim

Shmangia me dashje e komandantit nga urdhërat që i janë dhënë për luftim, e kryer jo me qëllim favorizimi të armikut, por në kundërshtim me rregullat ushtarake, dënohet me burgim nga tre deri në dhjetë vjet.

Po këto vepra, kur kanë sjellë pasoja të rënda, dënohen me burgim jo më pak se dhjetë vjet.

Neni 88

Largimi nga fusha e betejës dhe dorëzimi rob

Largimi pa të drejtë nga fusha e betejës në kohë luftimi ose refuzimi për të vepruar në kohë luftimi, si dhe dorëzimi rob, dënohet me burgim jo më pak se dhjetë vjet.

Neni 89

Humbja e flamurit

Ushtaraku, që nga pakujdesia humb flamurin në luftë, dënohet me

burgim nga tre deri në dhjetë vjet.

Braktisja e flamurit në luftë ose dorëzimi i tij armikut dënohet me burgim jo më pak se dhjetë vjet.

Neni 90

Lënia e një anijeje lufte në mbytje e sipër

Lënia e një anijeje lufte që është në mbytje e sipër, nga ana e komandantit që nuk ka kryer deri në fund detyrat e veta të shërbimit, si dhe nga ana e personave të ekuipazhit të anijes pa urdhrin përkatës të komandantit, dënohet me burgim jo më pak se dhjetë vjet.

Neni 91

Vazhdimi i armiqësisë pas armpushimit

Cilido që vazhdon armiqësinë pasi është shpallur zyrtarisht armëpushimi ose paqja ose shkel me mënyra të ndryshme kushtet e armpushimit që janë bërë të njohura, dënohet me gjobë, nxjerrje në lirim ose me burgim deri në pesë vjet.

Neni 92

Sjellja brutale me robërit e luftës

Sjellja brutale me robërit e luftës, si dhe kryerja e pakujdesshme e detyrave kundrejt atyre që janë të sëmurë apo të plagosur nga ana e personave që janë ngarkuar me mjekimin e tyre, dënohet me burgim deri në tre vjet.

Neni 93

Lënia e të plagosurve

Lënia e të plagosurve në fushën e luftës nga ana e personave që janë të detyruar t'i tërheqin, dënohet me burgim nga dy deri në dhjetë vjet.

Neni 94

Vrasja e plagosjet e personave të kapur rob

Cilido që plagos rëndë ose vret një armik që dorëzon armët ose nuk kundërshton me mënyra të tjera, dënohet me burgim nga tre deri në dhjetë vjet.

Keqtrajtimi i kufomës së armikut përbën kundërvajtje penale dhe dënohet me burgim deri në dy vjet.

Neni 95

Mbajtja pa të drejtë e shenjave të shërbimit shëndetsor në ushtri

Mbajtja e emblemës së Kryqit të kuq ose të gjysmë hënës së kuqe në zonat e operacionit ushtarak nga persona që nuk kanë të drejtë, si dhe dhënia e urdhrit nga ana e eprorëve për mbajtjen e tyre pa të drejtë, përbën kundërvajtje penale dhe dënohet me degradim, me gjobë ose me burgim deri në një vit.

Neni 96

Shpërdorimi i shenjave të shërbimit shëndetsor

Shpërdorimi në kohë lufte i flamurëve dhe emblemave të kryqit të kuq dhe gjysmë hënës së kuqe ose të ngjyrës së adoptuar të mjeteve të transportit të shërbimit shëndetësor, përbën kundërvajtje penale dhe dënohet me degradim, me gjobë ose me burgim deri në një vit.

Neni 97

Dëmtimi ose shkatërrimi i mjeteve të Kryqit të Kuq

Dëmtimi ose shkatërrimi në kohë lufte ose në gjendje të jashtëzakonshme i mjeteve ose materialeve, që i përkasin Kryqit të Kuq ose Gjysmë Hënës së Kuqe, dënohet me burgim deri në pesë vjet.

Kur këto vepra kanë shkaktuar pasoja të rënda dënohen me burgim nga pesë deri në pesëmbëdhjetë vjet.

DISPOZITA TË FUNDIT

Neni 98

Shfuqizohet tërësisht ligji nr.5591, datë 15.6.1977 për Kodin Penal të Republikës Popullore Socialiste të Shqipërisë me gjithë shtesat e ndryshimet e mëvonshme.

Neni 99

Rregullat e përcaktuara në ligjin nr.7941, datë 31.5.1995 “Për hyrjen në fuqi të ligjit nr.7895 datë 27.1.1995 “Për Kodin Penal të Republikës së Shqipërisë””, me ndryshimet e mëvonshme do të zbatohen edhe për këtë Kod.

Neni 100

Ky Kod hyn në fuqi më 15 nëntor 1995.

Shpallur me dekretin nr.1257, datë 30.10.1995 të Presidentit të Republikës së Shqipërisë, Sali Berisha

Botuar ne Fletoren Zyrtare nr. 22, Faqe 967